

## Tutu ña n̄taa taPablo ta t̄í'ví ra kua'an ña nda'a taFilemón

### *Xí'in to'on yó'o taPablo chíndeé ra taFilemón*

<sup>1</sup> Yi'i, taPablo, kúu i t̄aa t̄a nákaa ini ve'e k̄aa xa'a ña ká'an ndoso i to'on va'a xa'a Jesucristo. Ta xí'in ñani yó t̄aTimoteo t̄aa i tutu yó'o ta t̄í'ví ndi ña xa'a ña nda'a yó'ó, ñani yó taFilemón, t̄aa t̄a ndixa kí'vi ní ini ndi xini ndi, ta kúu ún t̄aa t̄a ñii káchí kása chiño noo Jesucristo xí'in ndi. <sup>2</sup> Saá tuku kóni ndi ña tutu yó'o xa'a ña nda'a ñáki'va yó ñáAapia xí'in tañani yó taArquipo, t̄aa t̄a ñii káchí xí'in ndi chíkaa ní ra ndee kása chiño ra noo Jesucristo. Ta kóni ndi ña tutu yó'o xa'a ña nda'a ndi'i n̄ivi na kándixa Jesucristo, na kúu na nákutá'an xí'in ún ve'e ún xa'a ña kása ká'no ndó Ndios. <sup>3</sup> Ta vitin Yivá yó Ndios xí'in Jesucristo, T̄aa t̄aKá'no noo yó, ná ke'é ra ñava'a xí'in ndó, ta ná taxi ra koo ñava'a ini ndó.

### *To'on yó'o ká'an ña ndi taFilemón kúu t̄aa t̄a vivíi ndíkon yichí Jesucristo*

<sup>4</sup> Ndi'i saá yichí ña ká'an i xí'in Ndios xa'a ún, ñani yó taFilemón, ta táxi i ña táxa'vi ña'á nda'a ra xa'a ún. <sup>5</sup> Saá chi xa xini so'o i xa'a ña vivíi kándixa ún Jesucristo, ta xa'a ña kí'vi ní ini ún xini ún ndi'i n̄ivi na kándixa ra. <sup>6</sup> Ta yó'ó xí'in m̄ii ndi, ñii káchí kándixa yó Jesucristo ta ndáa ini yó ra. Ta xa'a ñayó'o, ndúkú i noo Ndios ña ná chindeé ra yó'ó ña kasa ndivi ún ndi'i ñava'a ndatán yóo ña kóni ra. Ta xí'in ña ke'é ún saá, kunda'a va'a ini ún yu kúu ndi'i ñava'a kómí yó xa'a ña ñii yóo yó xí'in Jesucristo. <sup>7</sup> Ñani yó, yó'ó ndixa kí'vi ini ún xini ún nañani yó xí'in náki'va yó na kándixa Jesucristo, ta chíkaa ún ndee ini na. Ta ña

xini sɔ'o i ña ke'é ún saá kúu ña sákusij ní ini i ta chíkaa ña ndee ini i.

*Xí'in tɔ'on yó'o tɔPablo xáku ndá'ví ra noo tɔFilemón xa'a tɔOnésimo*

<sup>8</sup> Ta saá on vása yí'ví i ndukú i noo ún ña ke'é ún ñii ñava'a ní xí'in i vitin. Vará yóo ndayí kómí i ña ka'nda chiño i noo ún chi Ndios sákuiso chiño ra yí'i kúu i taapós-tol xí'in ndayí Jesucristo, ta on vása ka'nda chiño i noo ún saá. <sup>9</sup> Ta nda víka, xa'a ña ndixa kí'vi ini yó xini tá'an yó, xáku ndá'ví i noo ún ña ke'é ún ñii ñava'a yó'o xí'in i. Yí'i, tɔPablo, kúu i ñii taa tɔ xikua'a ní vitin, ta nákaa i ini ve'e kaa xa'a ña ká'an ndoso i tɔ'on va'a xa'a Jesucristo, <sup>10</sup> ta xáku ndá'ví i noo ún xa'a ñani yó tɔOnésimo. Tayó'o nduu ra ndatán yóo sa'ya mii i, chi tá'an nákaa i ini ve'e kaa yó'o, ta ndatɔ'on i xí'in ra tɔ'on va'a xa'a Jesucristo, ta tɔOnésimo yó'o kandixa ra tɔ'on yó'o, ta kixá'á ra ndikɔn ra yichi Jesucristo.

<sup>11</sup> Ta ñani yó tɔOnésimo yó'o, tá si'na tá'an kuiya nixiyo ra kisa chiño ra noo ún, taa tɔ on vása ndáya'ví xikuu ra xa'a chiño ke'é ra noo ún. Ta vitin xa nduu ra taa tɔ ndáya'ví ní xa'a chiño kisa ndivi ra noo i ta xa'a chiño noo mii ún. <sup>12</sup> Ta saá tí'ví i tayó'o ndikó ra naxaa ra noo mii ún vitin, ta xáku ndá'ví i noo ún ña va'a naki'in ún ra. Ta ñii ki'va ndatán va'a naki'in ún yí'i, saá va'a naki'in ún tayó'o. <sup>13</sup> Tá'an nákaa ka i ini ve'e kaa yó'o, xa'a ña ká'an ndoso i tɔ'on va'a xa'a Jesucristo, ndixa kusij ní ka ini i táná kindoo tɔOnésimo xí'in i, ní kúu. Saá chi ndixa chindeé ra yí'i ñii ki'va ndatán kóni ún chindeé ún yí'i. <sup>14</sup> Ta on vása ní-xiin i ndukú i noo ra ña kindoo ra xí'in i, saá chi yó'ó kúu taa tɔ si'na xini ñó'ó taxi ndayí nda'a ra kindoo ra xí'in i. Chi on vása xiin i ka'an i tɔ'on ña kasa nduxa xí'in ún xa'a ña chindeé ún yí'i, ta nda víka, kóni i ndí xí'in ña ndino'o ini ún ke'é ún ñandaɔa kuiti. <sup>15</sup> Ta

vará taOnésimo yó'o kee ra noo ún ta lo'o kivi ndañó'ó ra noo ún, ta ndákuiti Ndios taxi ra nindo'o ndó saá, xa'a ña vitin ndikó ra ve'e ún ta kutaku ra xí'in ún ndi'i saá kivi ña vaxi. <sup>16</sup> Saá chi vitin taOnésimo on vása ka kúu ra ñii taesclavo mii ún, \* chi kúu ra ñii ñani yó, ta ta kí'vi ini yó xini yó. Yi'i kí'vi ní ini i xini i taOnésimo yó'o, ta yó'ó xini ñó'ó ká'no ka kuki'vi ini ún koni ún ra. Saá chi kúu ra ñii ta ta ñii kí'va ndatán yóo mii ún, ta tuku kúu ra ñani ún xa'a ña kándixa ndó Jesucristo ta ñii yóo ndó xí'in ra vitin.

<sup>17</sup> Ta mii ún, tá ndixa xáni sinj ún ndí ñii káchí kisa chiño yó ta ñii kí'va saá ndáa ini yó Jesucristo, ta saá va'a naki'in ún taOnésimo yó'o, ñii kí'va ndatán va'a naki'in ún yi'i tá kixaa kivi ña xaa i noo ún. <sup>18</sup> Tá yóo ña on vá'a nike'é ra xí'in ún, án tá yóo ña níká ra s'ún noo ún, ta yi'i ndixa cha'vi i ndi'i ñayó'o nda'a ún. <sup>19</sup> Yi'i, taPablo, táa i to'on yó'o xí'in nda'a mii i, ta tuku ká'an i xí'in ún ndí ndixa cha'vi i ndi'i ña on vá'a nike'é ra xí'in ún án ña níká ra noo ún. Ta yi'i, on vása xini ñó'ó sanaká'an i yó'ó ndí yóo ña níká ún noo i xa'a ñava'a nike'é i xí'in ún. Chi xa'a ña ndato'on i to'on va'a xa'a Jesucristo xí'in ún, yó'ó kúu ta ta ndino'o táku noo Ndios vitin. <sup>20</sup> Ñani yó, xáku ndá'ví i noo ún ña kasa ndivi ún ñava'a yó'o xí'in i xa'a ña kí'vi ini ún xini ún Jesucristo. Ndúkú i noo ún ña chikaa ún ndee ini i xí'in ña kasa ndivi ún saá, chi yó'ó ta yi'i ñii yóo yó táku yó xí'in Jesucristo.

<sup>21</sup> Táa i tutu yó'o chi ndáa ini i ndí ndixa kasa ndivi ún ndi'i ña ndúkú i noo ún, tанда kua'a ní ka ñava'a chinóo ún noo ña ndúkú i kasa ndivi ún. <sup>22</sup> Ta yóo inka ñava'a ndúkú i noo ún: Va'a ná kasa ndivi ún ñii cuarto lo'o ve'e ún xa'a ña kindoo i kivi xaa i koto i yó'ó, chi

---

\* 1:16 Naesclavo kúu nivi na on vása kómí ndayí sandakoo na chiño kisa ndivi na noo napatrón na.

ndáti i ndí Ndios taxi ra ña yachi ní kuchiño xa*á* i koto i ndó'ó, chi ndi'i saá kivi ká'an ndó ndúkú ndó noo ra xa'a i.

*Xi'in to'on yó'o taPablo ndáyi ra taFilemón*

<sup>23</sup> Ta ñani yó taEpafras, ta kúu ta*á* ta nákaa ini ve'e ka*á* xi'in i, tí'ví ra to'on ña chindeé ra yó'ó. <sup>24</sup> Ta saá tuku nañani yó taMarcos, taAristarco, taDemas ta xi'in taLucas tí'ví nayó'o to'on ña chindeé na yó'ó. Ndi'i nataa yó'o ñii káchí kisa chiño na xi'in i noo Jesucristo.

<sup>25</sup> Ta vitin Jesucristo, Ta*á* taKá'no noo yó, ná ke'é ra kua'a ní ñava'a xi'in ndó. Saá ná koo ña.

Alacatlalzala Mixtec New Testament  
Mixtec, Alacatlalzala: Alacatlalzala Mixtec New Testament (New  
Testament+)

copyright © 2019 Wycliffe Bible Translators, Inc.

Language: Mixtec, Alacatlalzala

Contributor: Wycliffe Bible Translators, Inc.

All rights reserved.

2020-11-11

---

PDF generated using Haiola and XeLaTeX on 14 Jun 2022 from source files dated 13 Jun  
2022

a74bfb3f-bd55-5ab9-983e-8d19de48c198